

摛藻堂四庫全書薈要

集部

欽定四庫全書 蓋要卷一萬四千八百四十八

集部

東坡全集卷十六

宋蘇軾撰

詩八十八首

送戴蒙赴成都玉局觀將老焉

拾遺被酒行歌處野梅官柳西郊路聞道華陽版籍中  
至今尚有城南杜我欲歸尋萬里橋水花風葉暮蕭蕭  
芋魁徑尺誰能盡榦木三年已足燒百歲風狂定何有  
羨君今作峩眉叟縱未家生執戟郎也應世出埋輪守

莫欺老病未歸身玉局他年第幾人會待子猷清興發  
還須雪夜去尋君

送陳睦知潭州

華清縹渺浮高棟上有纈林藏石甕一杯此地初識君  
千巖夜上同飛鞚君時年少面如玉一飲百觚嫌未痛  
白鹿泉頭山月出寒光潑眼如流永朝元閣上酒醒時  
卧聽風鑾鳴鐵鳳舊遊空在人何處二十三年真一夢  
我得生還雪髯滿君亦老嫌金帶重有如社燕與秋鴻

相逢未穩還相送洞庭青草渺無際天柱紫蓋森欲動  
湖南萬古一長嗟付與騷人發嘲弄

用前韻答西掖諸公見和

雙猊蟠礎龍纏棟金井轆轤鳴曉甕小殿垂簾白玉鈎  
大冠立仗朱絲鞚風馭賓天雲雨隔孤臣忍淚肝腸痛羨  
君意氣風生坐落筆縱橫盤走水上樽日日寫黃封賜  
茗時時開小鳳閉門憐我老太玄絡札看君賦雲夢金  
奏不知江海眩木瓜屢費瑤瓊重豈惟蹇步因追攀已

覺侍史疲奔送春還宮柳腰肢活雨入御溝鱗甲動借  
君妙語發春容顧我風琴不成弄

次韻王覲正言喜雪

聖人與天通有詔寬獄市好語夜喧街濕雲朝覆砌紛  
然退朝後色映宮槐媚欲誇翦刻工故上朱藍袂我方  
執筆待未敢書上瑞君猶伏閣爭高論亦少慰霏霏止  
還作盪盪風與氣神龍久潛伏一怒勢必倍行當見三  
白拜舞謹萬歲歸來飲君家酣詠追既醉

和蔣發運

夜語飜千偈書來又一言此身真佛祖何處不羲軒船  
穩江吹坐樓空月入樽遙知思我處醉墨在頰垣

送表弟程六知楚州

烟炯明珠照雙璧當年三老蘇程石里人下道避鳩杖  
刺史迎門倒鳬鳥我時與子皆兒童狂走從人覓梨栗  
健如黃犢不可恃隙過白駒那暇惜醴泉寺古垂橘柚  
石頭山高闔松櫟諸孫相逢萬里外一笑未解千憂積

子方得郡古山陽老手風生謝刀筆我正含毫紫微閣  
病眼昏花困書檄莫教印綬繫餘年去掃墳墓當有日  
功成頭白早歸來共藉梨花作寒食

和人假山

上黨攬天碧玉環絕河千里抱商顏試觀煙雨三峯外  
都在靈仙一掌間造物何如童子戲寫真聊發使君闌  
何當挈取征西去畫作園床六曲山

送王伯敬守虢

華山東麓秦遺民當時依山來避秦至今風俗含古意  
柔柔澆水招行人行人掉臂不回首爭入崤函土囊口  
惟有使君千里來欲飲三堂無事酒三堂本來一事無  
日長睡起聞投壺牀頭硯石開雲月澗底松根斲雪腴  
山棚盜散人安寢勸買耕牛發陳廩歸來只作水衡卿  
我欲携壺就君飲

道者院池上作

下馬逢佳客攜壺傍小池清風亂荷葉細雨出魚兒井

好能永齒茶甘不上眉歸塗更蕭瑟真箇解催詩

次韻子由送干之姪

江上松楠深復深滿山風雨作龍吟年來老榦都生菌  
下有孫枝欲出林白髮未成歸隱計青衫儻有濟時心  
閉門試草三千牘反席求人少似今

書文與可墨竹

并敍

亡友文與可有四絕詩一楚詞二草書三畫四與可嘗  
云世無知我者惟子瞻一見識吾妙處既沒七年覩其

遺迹而作是詩

筆與子皆逝詩今誰為新空遺運斤質却弔斷絃人

次韻錢舍人病起

牀下龜寒且耐支杯中馳去未應衰殿門明日逢王傅  
榼具爭先看不疑坐覺香煙携袖少獨愁花影上廊遲  
何妨一笑千痾散絕勝倉公飲上池

次韻和王翬

謫仙竄夜郎子美耕東屯造物豈不惜要令工語言王

郎年少日文如銚水翻爭鋒雖剽甚聞鼓或驚犇天欲  
成就之使觸羝羊藩孤光照微陋耿如月在盆歸來千  
首詩傾寫五石樽却疑彭澤在頗覺蘇州煩君看鄒忌  
子廉折配春溫知音必無人壞壁掛桐孫

用王翬韻送其姪震知蔡州

九門挿天開萬馬先朝屯舉鞭紅塵中相見不得言夜  
走清虛宿扣門驚鵲翻君家汾陽家永巷車雷奔夕郎  
方不夕列戟以自藩相逢開月閣畫簷低金盆至今夢

中語猶舉燈前樽阿戎脩玉牒未單筆削煩君歸助獻

納坐繼岑與溫我客二子間不復尋諸孫

子美詩云權  
門多噂沓且

復尋  
諸孫

虢國夫人夜遊圖

佳人自鞚玉花驄翩如驚燕踏飛龍金鞭爭道寶釵落  
何人先入明光宮宮中羯鼓催花柳玉奴絃索花奴手  
坐中八姨真貴人走馬來看不動塵明眸皓齒誰復見  
只有丹青餘淚痕人間俯仰成今古吳公臺下雷塘路

當時一笑潘麗華不知門外韓擒虎

用舊韻送魯元翰知洛州

我在東坡下躬耕三畝園君為尚書郎坐擁百吏繁鳴  
蛙與鼓吹等是俗物喧永謝十年舊老死三家村惟君  
繩袍信到我雀羅門緬懷故人意欲使薄夫敦斯年對  
宣室白首代堯言相逢問前輩所見多後昆道館雖云  
樂冷卿當復溫還持刺史節却駕朱輪軒黃髮方用事  
白鬚宜少存嗣聖真生知救民如救燔初因羽淵魄盡

返湘江魂坐憂東郡決老守思王尊北流桑柘沒故道  
塵埃翻知君一寸心可敵千步垣流亡自栖止老幼忘  
崩奔得閑閉閣坐勿使道眼渾聊乘應捨杖直泝無生  
源歸來成二老夜榻當重論

次韻朱光庭初夏

朝罷人人識鄭崇直聲如在履聲中卧聞疎響梧桐雨  
獨詠微涼殿閣風諫苑君方續承業醉鄉我欲訪無功  
陶然一枕誰呼覺牛蟻新除病後聰

次韻朱光庭喜雨

久苦趙盾日欣逢傳說霖坐知千里足初覺兩河深破屋常持傘無薪欲爨琴清詩似庭燎雖美未忘箴

奉敕祭西太一和韓川韻四首

聖主新除祕祝侍臣來乞豐年壽宮神君欲至半夜靈風肅然

玉璽親題御筆金章來侍天香禮罷祝融參乘前驅已

過衡湘

解劍獨行殘月披衣困卧清風夢蝶猶飛旅枕粥魚已  
響枯桐

陂水初含曉綠稻花半作秋香皂蓋却迎朝日紅雲正  
遶宮牆

西太一見王荊公舊詩偶次其韻二首

秋早川原淨麗雨餘風日清酣從此歸耕劍外何人送  
我池南

但有樽中若下何須墓上征西聞道烏衣巷口而今煙

草淒迷

次韻子由送陳侗知陝州

誰能如鐵牛橫身負黃河滔天不能沒尺箋未易訶世俗自無常徐公故逶迤別來不可說事與浮雲多當時無限人毀譽即墨阿虛聲了無實夜蟲鳴機梭相逢一笑外柰此白髮何天驥皆篤雲長鳴飽芻禾王庭旅百寶大具隨弓戈君獨一麾去欲賡五袴歌甘棠古樂國白酒金叵羅知君不久留沿行中新科過客足嗔喜東堂

記分鵝此外但坐歛後生工揣摩

送賈訥倅眉二首

當年入蜀歎空回未見我眉肯再來童子遙知頌襦袴

使君先已洗樽罍

李大夫眉之賢守也

鹿頭北望應逢鴈人日東

郊尚有梅

人日出東郊渡江游

我老不堪歌樂職後生

試覓子淵才

老翁山下玉淵回手植青松三萬裁父老得書知我在  
小軒臨水為君開試看一一龍蛇活更聽蕭蕭風雨哀

便與甘棠同不翦蒼鬚白甲待歸來

先君墓於墓頤山之東二十餘里地

名老翁泉君許為一往感歎之深故及

送程建用

先生本舌耕文字浩千頃空倉付公子坐待發苔顚十年困新說兒女爭捕影鑿垣種蒿蓬嘉穀誰復省空餘南陔意太息北堂冷織屢隨方進採薪教韋逞辛勤守一經菽水賢五鼎今年聞起廢魯史復光景公子亦改官三就繁馬頭歸來一笑粲素髮颯垂領會看金花詔

湯沐奉朝請天公不吾欺壽與龜鶴永

次韻李脩孺留別二首

十年流落敢言歸魚鳥江湖只自知豈意青天掃雲霧  
盡呼黃髮寄安危風流吾子真前輩人物他年記一時  
我欲折繡留此老繙衣誰作好賢詩

此生別袖幾回麾夢裏黃州空自疑何處青山不堪老  
當年明月巧相隨窮通等是思家意衰病難堪送客悲  
好去江魚煮江水劚南歸路有姜詩

次韻黃魯直赤目

誦詩得非子夏學紬史正作丘明書天公戲人亦薄相  
略遣幻翳生明珠賴君年來屏鮮腴百千燈光同一如  
書成自寫蠅頭表端就君王覓鏡湖

和周正孺墜馬傷手

平生學道已神完豈復兒童私自憐醉墜何曾傷內守  
色憂當為念先傳書空漸覺新詩健把蟹行看樂事全  
賣却老驄為酒直大呼鄉友作新年

戲周正儒二絕

折臂三公未可知  
會當千鑑訪權奇  
勸君鬻駱猶閑事  
腸斷閨中楊柳枝

天廐新頌玉鼻騤  
故人共弊亦常情  
相如雖老猶能賦  
換馬還應繼二生

題文與可墨竹

并敘

故人文與可為道師王執中作墨竹且謂執中勿使他人書字待蘇子瞻來令作詩其側與可既沒八年而軾

始還朝見之乃賦一首

斯人定何人游戲得自在詩鳴草聖餘兼入竹三昧時  
時出木石荒恠軼象外舉世知珍之賞會獨余最知音  
古難合奄忽不少待誰云死生隔相見如龔隗

潘推官母李氏挽詞

南浦淒涼老逐臣東坡還徃盡幽人杯盤慣作陶家客  
弦誦常叨孟母隣尚有升堂他日約豈知負土一阡新  
今年我欲江湖去暮雨連山寧樹春

王堂栽花周正孺有詩次韻

故山桃李半荒榛粗報君恩便乞身竹簾暑風招我老  
玉堂花蕡為誰春纖纖翠蔓詩催發皎皎霜葩髮鬪新  
只有來禽青李帖他年留與學書人

杜介送魚

新年已賜黃封酒舊老仍分頰尾魚陋巷關門負朝日  
小園除雪得春蔬病妻起研銀絲膾稚子謹尋尺素書  
醉眼矇矓覓歸路松江煙雨晚疎疎

送杜介歸楊州

再入都門萬事空閑看清洛漾東風當年幃幄幾人在  
回首觚稜一夢中採藥會須逢薊子問禪何處識龐翁  
歸來鄰里應迎笑新長淮南舊桂叢

秋詠石屏

霏霏點輕素眇眇開重陰風花亂紫翠雪外有煙林雪  
近勢方壯林遠意殊深會有無事人支頤識此心

和黃魯直燒香二首

四句燒香偈子隨香遍滿東南不是閒思所及且令鼻觀先參

萬卷明憲小字眼花只有爛斑一炷煙消火冷半生身  
老心間

再和二首

來詩言飲酒  
畫竹石草書

置酒未逢休沐便同越北燕南且復歌呼相和隔牆知

是曹參

丹青已自前世竹石時窺一班五字當還靖節數行誰

似高間

武昌西山

并敍

嘉祐中翰林學士承旨鄧公聖求為武昌令常遊寒溪  
西山山中人至今能言之軾謫居黃岡與武昌相望亦  
常往來溪山間元祐元年十一月二十九日考試館職  
與聖求會宿玉堂偶話舊事聖求嘗作元次山窪樽銘  
刻之巖石因為此詩請聖求同賦當以遺邑人使刻之

銘側

春江渌漲蒲萄醅武昌官柳知誰栽憶從樊口載春酒  
步上西山尋野梅西山一上十五里風駕雨披飛崔嵬  
同遊困卧九曲嶺褰衣獨到吳王臺中原北望在何許  
但見落日低黃埃歸來解劍亭前路蒼崖半入雲濤堆  
浪翁醉處今尚在石臼杯飲無樽罍爾來古意誰復嗣  
公有妙語留山隈至今好事除草棘常恐野火燒蒼苔  
當時相望不可見玉堂正對金鑾開豈知白首同夜直  
卧看椽燭高花摧江邊曉夢忽驚斷銅環玉鎖鳴春雷

山人帳空猿鶴怨江湖水生鴻鴈來請公作詩寄父老  
往和萬壑松風哀

再用前韻

朱顏發過如春醅胸中梨棗初未裁丹砂未易掃白髮  
赤松却欲參黃梅寒溪本自遠公社白蓮翠竹依崔嵬  
當時石泉照金像神光夜發如五臺飲泉鑒面得真意  
坐視萬物皆浮埃欲收暮景返甲里遠泝江水窮離堆  
還朝豈獨羞老病自歎才盡傾空罍諸公渠渠若夏屋

吞吐風月清隅隈我如廢井久不食古甕缺落生陰苔  
數詩往復相感發汲新除舊寒光開遙知二月春江闊  
雪浪倒捲雲峯摧石中無聲水亦靜云何解轉空山雷  
欲就諸公評此語要識夏喜何從來願求南宗一句水  
往與屈賈湔餘哀韋應物詩云水性本云靜石中固無聲如何雨相激雷轉空山驚

送楊孟容

我家峩眉陰與子同一邦相望六十里共飲玻璃江江  
山不違人遍滿千家窓但苦窓中人寸心不自降子歸

治小國洪鐘喧徵撞我留侍玉坐弱步敲豐扛後生多  
高才名與黃童雙不肯入州府故人餘老龐憲熟與問  
訊愛惜霜眉龐何以待我歸寒醅發春缸

見子由與孔常父唱和詩輒次其韻余昔在館  
中同舍出入輒相聚飲酒賦詩近歲不復講故  
終篇及之庶幾諸公稍復其舊亦太平盛事也

君先魯東家門戶照千古文章固應爾須鬚髯餘似處雖  
非蒙俱狀尚有歷國苦誦書口瀾翻布穀雜杜宇十年

困犇走櫛沐飽風雨吾道其非耶野處豈兕虎灞陵閑  
老將柏直口尚乳自君兄弟還鼎立知有補蓬山者舊  
嚴故事誰刪去來迎馮翊傳出錢會稽組吾猶及前輩  
詩酒盛冊府願君唱此風揚禪斯杜舉

趙令晏崔白大圖幅徑三丈

扶桑大璽如甕盎天女織綃雲漢上往來不遣鳳嚙梭  
誰能鼓臂投三丈人間刀尺不敢裁丹青付與濠梁崔  
風蒲半折寒鴈起竹間的礪橫江梅畫堂粉壁翻雲幕

十里江天無處着好卧元龍百尺樓笑看江水拍天流

次韻張昌言給事省宿

馮顛久已散殘雪戎眼何曾眩落暉朔野按行猶雀躍

東臺暝坐覺烏飛

道家有烏飛入兔宮之說

漫誇年少容吾在

樂天詩云

猶有誇張少年處笑呼張丈喚殷兄

若鬪樽前舉世稀待向崧陽求水竹

一犁煙雨伴公歸

和三舍人省上

三月二十九日作明  
日駕幸景靈宮

紛紛榮瘁何能久雲雨從來翻覆手悅如一夢墮枕中

却見三賢起江右

曾子開劉蕡父孔經父皆江西人

嗟君妙質皆瑚璉

顧我虛名但箕斗明朝冠蓋蔚相望共扈翠輦朝宣光  
武皇已老白雲鄉正與羣帝驂龍翔獨留杞梓扶明堂

送錢承制赴廣南路分都監

當年我作表忠碑坐覺江山氣未衰舞鳳尚從天日下  
收駒時有渥洼姿據床到處堪吹笛橫槊何人解賦詩  
知是丹霞破佛手先聲應已憚羣夷

廣西僧寺頃有佛動之異錢君碎而

投之

江中

次韻曾子開從駕二首

街槐綠閣雨初勻瑞霧香風滿後塵清廟幸同觀濟濟  
豐年喜復接陳陳雍容已饜天庖賜俯伏初嘗貢茗新  
輦路歸來聞好語共驚堯顙類高辛

入仗魂驚愧草菜一聲清蹕九門開暉暉日傍金輿轉  
習習風從玉宇來流落生還真一芥周章危立近三槐  
學士班  
近執政道傍儻有山中舊問我收身早晚回

再和

眼花錯莫鬢霜勻病馬羸驄只自塵奉引拾遺叨侍從  
思歸少傳羨朱陳哀年壯觀空驚目嶮韻清詩苦鬪新  
最後數篇君莫厭擣殘椒桂有餘辛

憶觀滄海過東萊日照三山迤邐開崖觀飛樓凌霧起  
仙幢寶蓋拂天來不聞宮漏催晨箭但覺簷陰轉古  
槐供奉清班非老處會稽何日乞方回

時方關  
會稽守

次韻劉貢父省上喜雨

密雲今日破郊西疎雨瀟瀟未作泥要及清閒同笑語

行看衰病費扶携花前白酒傾雲液戶外青驥響月題

不用臨風苦揮淚君家自與竹林齊

貢父詩中言不及與其兄原父同時

之數然其兄子仲馮今為起居舍人

再和

當年曹守我膠西共厭餚糟與汨泥自古赤丸成習俗  
因公黃犧免提携生還各有青山興病起猶能小字題  
莫恠歌吁數相和曾將獄市寄全齊

貢父為曹州盜賊皆奔秦境蓋嘗有

詩云從來晉

益稍奔秦

送顧子敦奉使河朔

我友顧子敦軀膽兩俊偉便便十圍腹不但貯書史容  
君數百人一笑萬事已十年卧江海了不見溫喜磨刀  
向豬羊醞酒會鄰里歸來如一夢豐頰愈茂美平生批  
敕手濃墨寫黃紙會當勒燕然廊廟登劒履翻然向河  
朔坐念東郡水河來屹不去如尊乃勇耳

次韻子由送家退翁知懷安軍

吾州同年友粲若琴上星當時功名意豈止拾紫青事

既喜違願天或不假齡今如圖中鶴俛仰在一庭

吾州同年

友十三人今存者六人而已故有琴上星圖中鶴之語

西南正春早廢沼黏枯萍

翩然一麾去想見靈雨零我無謫仙句待詔沉香亭空

騎內廄馬天伏隨雲駢竟無絲毫補眷焉誰汝令永愧

舊山叟憑君寄丁寧

諸公餞子敦軾以病不往復次前韻

君為江南英面作河朔偉人間一好漢誰似張長史上  
書苦留君言拙輒報已置之勿復道出處俱可喜攀輿

共六尺食肉飛萬里誰言遠近殊等是朝廷美遙知送  
別處醉墨爭淋紙我以病杜門商頌空振履後會知何  
日一觀如覆水善保千金軀前言戲之耳

和張昌言喜雨

二聖憂愁忘寢食百神奔走會風雲禁林夜直鳴江瀨  
清洛朝回起縠紋夢覺酒醒聞好句帳空簾冷發餘薰  
秋來定有豐年喜剝作新詩準備君

次韻劉貢父西省種竹

要知西掖承平事記取劉郎種竹初舊德終呼名字外

後生誰續笑談餘

昔李公擇種竹館中戲語同舍後人  
指此竹必云李文正手植貢父笑曰

已疎白首林間望天上平安時報故人書

李衡公北都童子寺竹寺

僧日報

平安

偶與客飲孔常父見訪方設席延請忽上馬馳  
去已而有詩戲用其前韻答之

揚雄他文不皆奇獨稱觀鏘居井眉酒客法士兩小兒

陳遵張竦曾何知主人有酒君獨醉蟹螯何不左手持  
宜復見吾橫氣機遣人追君君絕馳盡力去花君自癡  
醍醐與酒同一卮請君更問文殊師

次韻子由書李伯時所藏韓幹馬

潭潭古屋雲幕垂省中文書如亂絲忽見伯時畫天馬  
朔風胡沙生落錐天馬西來從西極勢與落日爭分馳  
龍膺豹股頭八尺奮迅不受人間羈元狩虎脊聊可友  
開元玉花何足奇伯時有道真吏隱飲啄不羨山梁雌

丹青弄筆聊爾耳意在萬里誰知之幹惟畫肉不畫骨  
而况失實空餘皮煩君巧說腹中事妙語欲遺黃泉知  
君不見韓生自言無所學廄馬萬匹皆吾師

次韻劉貢父獨直省中

明窓畏日曉先曇高柳鳴蜩午更喧筆老新詩疑有物  
心空客疾本無根隔牆我亦眠風榻上馬君先瓊月軒  
共喜早歸三伏近解衣盤礴亦君恩

軾以去歲春夏侍立邇英而秋冬之交子由相

繼入侍次韻絕句四首各述所懷

瞳瞳日脚曉猶清細細槐花暖自零坐閱諸公丰廊廟

時看黃色起天庭

僕射呂公門下韓公左丞劉公皆自講席大用

上尊初破早朝寒茗盃仍沾講舌乾陞楯諸郎空兩立  
故應慙悔不儒冠

兩鶴摧頽病不言年來相繼亦乘軒悵聞九奏聊飛舞  
可得裴回為啄吞

微生偶脫風波地晚歲猶存鐵石心定是香山老居士

世緣終淺道根深

樂天自江州司馬除忠州刺史旋以  
主客郎中知制誥遂拜中書舍人軾  
雖不敢自此然謫居黃州起知大登名為儀曹遂忝侍  
從出處老少大畧相似庶幾復享此翁晚節閒適之樂

焉

送宋朝散知彭州迎侍二親

東來誰迫使君車知是丈人屋上烏丈人今年二毛初  
登樓上馬不用扶使君負弩為前驅蜀人不復談相如  
老幼化服一事無有鞭不施安用蒲春波如天漲平湖  
鞋紅照坐香生膚卷韁上壽白玉壺公堂登歌鳳將翫

諸孫懽笑爭挽鬚蜀人畫作西湖圖

郭熙畫秋山平遠

路公為跋尾

玉堂晝掩春日閒中有郭熙畫春山鳴鳩乳燕初睡起  
白波青嶂非人間離離短幅開平遠漠漠疎林寄秋晚  
恰似江南送客時中流回頭望雲嶺伊川佚老鬢如霜  
臥看秋山思洛陽為君紙尾作行草烟如嵩洛浮秋光  
我從公遊如一日不覺青山暎黃髮為畫龍門八節灘  
待向伊川買泉石

次韻張昌言喜雨

千里黃流失故居年來赤地到青徐遙聞爭誦十行語  
無異親巡六尺輿精貫天人一言足雲興嶽瀆萬靈趨  
愛君誰似元和老賀雨詩成即諫書

書晁補之所藏與可畫竹三首

與可畫竹時見竹不見人豈獨不見人嗒然遺其身其  
身與竹化無窮出清新莊周世無有誰知此疑神  
若人今已無此竹寧復有那將春蚓筆畫作風中柳君

看斷崖上瘦節蛟蛇走何時此霜竿復入江湖手

晁子拙生事舉家聞食粥朝來又絕倒謾墓得霜竹可憐先生禦朝日照首蓿吾詩固云爾可使食無肉吾舊詩云

可使食無肉  
不可居無竹

戲用晁補之韻

昔我嘗陪醉翁醉今君但吟詩老詩清詩咀嚼那得飽  
瘦竹瀟灑令人饑誰問鳳凰饑食竹何如駕馬肥苜蓿  
知君忍饑空誦詩口頰闊翻如布穀

書皇親畫扇

十年江海寄浮沉  
況夢迷江南黃葦林  
誰謂風流貴公子  
筆端還有五湖心

書李世南所畫秋景

野水參差落漲痕  
疎林散倒出霜根  
扁舟一棹歸何處  
家在江南黃葉村

人間斤斧日創夷  
誰見龍蛇百尺姿  
不是溪山曾獨往  
何人解作掛猿枝

書鄢陵王生簿所畫折枝二首

論畫以形似見與兒童鄰賦詩必此詩定非知詩人詩  
畫本一律天工與清新邊鸞雀寫生趙昌花傳神何如  
此兩幅疎澹含精勻誰言一點紅解寄無邊春

瘦竹如幽人幽花如處女低昂枝上雀搖蕩花間雨雙  
翎決將起衆葉紛自舉可憐採花蜂清蜜寄兩股若人  
富天巧春色入毫楮懸知君能詩寄聲求妙語

昨見韓丞相言王定國今日玉堂獨坐有懷其

人

晝臥玉堂上微風舉輕紈銅瓶下碧井百尺鳴飛瀾俛仰清夢餘愛此一掬寒似予平生友苦語涼肺肝秀眉玉兩頰矯矯如翔鸞置之江淮交清詩洗江湍紅鱗對白酒信美非所安丞相功業成還家酒杯寬人間有此客折簡呼不難相將扣東閣起舞盡餘歡

和張耒高麗松扇

可憐堂堂十八公老死不入明光宮萬牛不來難自獻

裁作團團手中扇屈身蒙垢君一洗桂名君家詩集裏  
猶勝漢宮悲婕妤網蟲不見乘鸞子

故李承之待制六丈挽詞

青青一寸松中有梁棟姿天驥墮地走萬里端可期世  
無阿房宮可建五丈旗又無穆天子西征燕瑤池材大  
古難用老死亦其宜丈夫忍不免豈患莫已知公如松  
與驥少小稱偉奇俯仰自廊廟笑談無羌夷清朝竟不  
用白首仍憂時願斬橫行將請烹乾沒兒言雖不見省

坐折姦雄窺嗟我去公久江湖生白髭歸來耆舊盡零落存者誰比公嵇中散龍性不可羈疑公李北海慷慨多雄詞淒涼五君詠沉痛八哀詩邪正久乃明人今屬公思九原不可傳千古有餘悲

次韻孔常父送張天覺河東提刑

送君應典鶴鸞裘憑伏千鍾洗別愁脫帽風流餘長史

君喜草書而不工故以此為戲埋輪家世本留侯

張綱子房七世孫也  
犍為武陽人墓在今

彭山君豈其後耶

麟府馬出子河泌

子河駿馬方爭出昭義疲兵亦少

休

唐向昭義步兵  
蓋澤潞弓箭手

定向秋山得嘉句故問黃葉滿行輶

送天覺得山字

西登太行嶺北望清涼山晴空浮五髻  
掩藹卿雲間餘光入巖石神草出茅菅  
何人相指似稍稍落人寰能念墜指兒  
虬髯生水顏祝君如此草為民已瘦  
我亦老且病眼花腰脚頑念當勤致此  
莫作河東慳

次韻王定國揚州倅

此身江海寄天遊一落紅塵不易收未許  
相如還蜀道

空教何遜在揚州又驚白酒催黃菊尚喜朱顏映黑頭  
火急著書千古事虞卿應未厭窮愁


東坡全集卷十六

謹案卷十六第六頁前二行權門多囁沓刊本脫  
權字又沓訛醜並據杜集增改

第十五頁前三行雪浪倒捲雲峯摧刊本雪訛雲  
據施本改

第二十頁後五行寺僧日報平安刊本平訛日據  
酉陽雜俎改





總校官庶吉士臣張能照  
校對官助教臣金學詩  
謄錄監生臣徐士俊

欽定四庫全書會要

集部

東坡全集卷十七

詳校官助教臣常循



欽定四庫全書  
薈要卷一萬四千八百四十九集部

東坡全集卷十七

宋蘇軾撰

詩八十八首

贈李道士

并敘

閣部員外郎李君宗固景祐中良吏也守漢州有道士尹可元精練善畫以遺火得罪當死君緩其獄會赦獲免時可元年八十一自誓且死必為李氏予以報可元既死二十餘年而君子世昌之婦夢可元入其室生子

曰得柔小名蜀孫幼而善畫既長讀莊老喜之遂為道士賜號妙應事母以孝謹聞其寫真蓋妙絕一時云

世人只數曹將軍誰知虎頭非癡人腰間大羽何足道  
頰上三毛自有神平生狎侮諸公子戲著幼輿巖石裏  
故教世世作黃冠布襪青鞋弄雲水千年鼻祖守關門  
一念還為李耳孫香火舊緣何日盡丹青餘習至今存  
五十之年初過二衰顏記我今如此他時要指集賢人

知是香山老居士

樂天為翰林學士  
奉詔寫真集賢院

次韻張舜民自御史出倅虢州留別

玉堂給札氣如雲初喜湘釁復佩銀樊口淒涼已陳迹

昔與張同遊武昌樊口來詩中及之

班心突兀見長身

臺史謂御史立處為班心江湖

前日真成夢鄴杜他年恐卜隣此去若容陪坐嘯故應

客主盡詩人

次韻米黻二王書跋尾二首

三館曝書防蠹毀得見來禽與青李秋蛇春蚓久相雜  
野鷺家雞定誰美玉函金籥天上来紫衣敕使親臨啟

紛綸過眼未易識磊落挂壁空雲委歸來妙意獨追求  
坐想蓬山二十秋怪君何處得此本上有桓玄寒具油  
巧偷豪奪古來有一笑誰似癡虎頭君不見長安永寧  
里王家破垣誰復修

元章作書日千紙平生自苦誰與美畫地為餅未必似  
要令癡兒出饑水錦囊玉軸來無趾粲然奪真疑聖智  
忍饑看書淚如洗至今魯公餘乞米

次韻宋肇惠澄心紙二首

詩老囊空一不留百畊曾作百金收

水叔以澄心百幅遺聖俞聖俞有詩

知君也厭雕肝腎分我江南數斛愁

君家家學陋相如宜與諸儒論石渠古紙無多更分我

自應給札奏新書

郭熙秋山平遠二首

目盡孤鴻落照邊遙知風雨不同川此間有句無人見  
送與襄陽孟浩然

木落騷人已怨秋不堪平遠發詩愁要看萬壑爭流處

他日終煩顧虎頭

送歐陽辯監瀘州酒

汗血駕鼓車何從致千里紛紛糟麴間欲試賢公子君  
家江南英濯足滄浪水竭渡舊黃河漲沙埋馬耳由來  
付造物倚伏何窮已當念楚子文三仕無愠喜

九月十五日邇英講論語終篇賜執政講讀史

官燕于東宮又遣中使就賜御書詩各一首臣

軾得紫薇花絕句其詞云絲綸閣下文書靜鐘

鼓樓中刻漏長獨坐黃昏誰是伴紫薇花對紫  
薇郎翌日各以表謝又進詩一篇臣軾詩云

繡裳畫袞雲垂地不作成王翦桐戲日高黃繖下西清  
風動槐龍舞交翠邇英閣前有雙槐  
穆枝屬地如龍形壁中蠹簡今千年

漆書蝌蚪光射天諸儒不復憂吻燥東宮賜酒如流泉  
酒酣復拜千金賜一紙驚鸞回鳳字蒼顏白髮便生光  
袖有驪珠三十四臣所賜詩并題目及歸來車馬已喧  
臣姓名凡三十四字歸來車馬已喧

聞爭看銀鈎墨色鮮人間一日傳萬口喜見雲章第一

篇上前此未嘗以御書賜羣臣

玉堂畫掩文書靜鈴索不搖鐘漏永

莫言弄筆數行書須信時平由主聖犬羊散盡沙漠空

捷烽夜到甘泉宮似聞指麾築上郡已覺談笑無西戎

時熙河新獲鬼章是日涇原復奏夏賊數十萬人皆遁去

文思天子師文母終閉玉

闕辭馬武小臣願對紫薇花試草尺書招贊普

謹按唐制翰林

學士帶知制誥許綴中書舍人班今臣以知制誥待罪禁林故得以紫薇為故事

和王晉卿

并敘

駙馬都尉王詵晉卿功臣全彬之後也元豐二年予得

罪貶黃岡而晉卿亦坐累遠謫不相聞者七年予既召用晉卿亦還朝相見殿門外感歎之餘作詩相屬託物悲慨阨窮而不怨泰而不驕佳其貴公子有志如此故次其韻

先生飲東坡獨舞無所屬當時挹明月對影三人足醉眠草棘間蟲虺莫予毒醒來送歸鴈一寄千里目悵焉懷公子旅食久不玉欲書加餐字遠託西飛鵠謂言相濡沫未足救溝瀆吾生如寄耳何者為禍福不如兩相

忘昨夢那可逐上書得自便歸老湖山曲躬耕二頃田  
自種十年木豈知垂老眼却對金蓮燭公子亦生還仍  
分刺史竹賢愚有定分尊俎守尸祝文章何足云執技  
等醫卜朝廷方西顧羨虜驕未伏遙知重陽酒白羽落  
黃菊羨君真將家浮面氣可掬袁天罡語竇軌君語則赤氣浮面為將勿多殺  
人何當請長纓一戰河湟復

謝王澤州寄長松兼簡張天覺二首

莫道長松浪得名能教覆額兩眉青便將徑寸同千尺

知有奇功似茯苓

憑君說與埋輪使速寄長松作解嘲

送張天覺詩有埋  
輪及河東惺之語

無復青黏和漆葉枉將鍾乳敵仙茅

次韻劉貢父所和韓康公憶持國二首

夢覺真同鹿覆蕉相君脫屣自參寥顏紅底事髮先白  
室邇何妨人自遙狂似次公應未怪醉推東閣不須招  
援毫欲作衣冠表盛事終當繼八蕭

唐蕭氏自瑀及  
八宰相

閉戶端居念獨深小軒朱檻憶同臨燎鬚誰識英公意

英

為其姊作粥燎須曰吾與姊皆老矣能幾進粥黃髮聊知子建心子建與楚王彪別詩云王其愛

玉體共享黃髮期已託西風傳絕唱且邀明月伴孤斟他時內

集應呼我下客先判醉墮簪

次韻劉貢父叔姪扈駕

玉堂孤坐不勝清長羨枚鄒接長卿只許隔牆聞置酒時因議事得聯名機雲似我多遺俗廣受如君不治生共託屬車塵土後鈞天一餉夢中榮

次韻韓康公置酒見留

庭下黃花一醉同。重來雪嶽已穹窿。  
不應屢費譏安石。但使母多酌次公。  
鍾乳金釵人似玉。鷗絃鐵撥坐生風。  
少卿尚有車茵在。頗覺寬容勝弱翁。

次韻王都尉偶得耳疾

君知六鑿皆為贅。我有一言能決疣。  
病客巧聞牀下蟻。癡人強覲棘端猴。  
聰明不在根塵裏。藥餌空為婢僕憂。  
但試周郎看聾否。曲音小誤已回頭。

送喬全寄賀君六首

并敘

舊聞靖長官賀水部皆唐末五代人得道不死章聖皇帝東封有謁於道左者其謁云晉水部員外郎賀元再拜而去上不知也已而閱謁見之大驚物色求之不得天聖初又使其弟子喻澄者詣闕進佛道像直數千萬張公安道與澄遊具得其事又有喬全者少得大風疾幾死賀使學道今年八十益壯盛人無復見賀者而全數見之元祐二年十二月全來京師十許日予留之不可曰賀以上元期我於蒙山又曰吾師嘗遊密州識

君於常山道上意若喜君者作是詩以送之且作五絕  
句以寄賀

君年二十美且都初得惡疾隨眉鬚紅顏白髮驚妻孥  
覽鏡自嫌欲棄軀結茅窮山啖松腴路逢逃秦博士盧  
方瞳照野清而曜再拜未起煩一呼覺知此身了非吾  
烟然蓮花出泥塗隨師東遊渡離却離知密州二水名山頭見  
我兩輪朱豈知仙人混屠沽爾來八十胸垂胡上山如  
飛瞋人扶東歸有約不敢渝新年當參老仙儒秋風西

來下雙鳬得棗如瓜分我無

生長兵間早脫身晚為元祐太平人不驚渤海桑田變  
來看龜蒙漏澤春

曾謁東封玉輶塵幅巾短褐亦逡巡行宮夜奏空名姓  
悵望雲霞縹渺人

垂老區區豈為身微言一發重千鈞始知不見高皇帝  
正似商山四老人

舊聞父老晉郎官已作飛騰變化看聞道東蒙有居處

願供薪水看燒丹

千古風流賀季真最怜嗜酒謫仙人狂吟醉舞知無益  
栗飯藜羹問養神

送家安國教授歸成都

別君二十載坐失兩鬢青吾道雖艱難斯文終典刑屢作退飛鷁羞看乾死螢一落戎馬間五見霜葉零夜談空說劍春夢猶橫經新科復舊貫童子方乞靈須煩凌雲手去作入蜀星蒼苔高朕室古栢文翁庭初聞編簡

香始覺鋒鏑腥岷峨有雛鳳梧竹養脩翎嗚呼應嶠律  
飛舞集虞廷吾儕便歸老亦足慰餘齡

和子由除夜元日省宿致齋三首

江淮流落豈關天禁省相望亦偶然等是新年未相見  
此身應坐不歸田

白髮蒼顏五十三家人強遣試春衫朝回兩袖天香滿  
頭上銀幡笑阿咸

當年踏月走東風坐着春闌鑽醉翁白髮門生幾人在

却將新句調兒童

次韻答張天覺二首

車輕馬穩轡銜堅但有蚊蟲喜撲緣截斷口前君莫怪  
人間差樂勝巢仙

馭風騎氣我何勞且要長松作土毛亦如訶佛丹霞老  
却向清涼禮白毫

次韻黃魯直畫馬試院中作

少年鞍馬勤遠行臥聞艷草風雨聲見此忽思短策橫

十年髀肉磨欲透那更陪君作詩瘦不如羊魁歸飯豆

門前欲嘶御史驄詔恩三日休老翁羨君懷中雙橘紅

老母黃有

余與李薦方叔相知久矣領貢舉事而李不得

第愧甚作詩送之

與君相從非一日筆勢翩翩疑可識平時謾說古戰場  
過眼終迷日五色我慙不出君大笑行止皆天子何責  
青袍白紵五千人知子無怨亦無德買羊沽酒謝玉川

爲我醉倒春風前歸家但草凌雲賦我相夫子非癯仙

和王晉卿送梅花次韻

東坡先生未歸時自種來禽與青李五年不踏江頭路  
夢逐東風泛蘋芷江梅山杏爲誰容獨笑依依臨野水  
此間風物君未識花浪翻天雪相激明年我復在江湖  
知君對花三嘆息

和宋肇遊西池次韻

漢皇慈儉不開邊尚教千艘下瀨船貪看艤艤飛鬪艦

不知頭顱舞鈎天故山西望三千里往事回思二十年  
自笑區區足官府不如公子散神仙

書艾宣畫四首

竹鶴

此君何處不相宜况有能言老令威誰識長身古君子  
猶將緇布緣深衣

黃精鹿

太華西南第幾峯落花流水自重重幽人只採黃精去

不見春山鹿養茸

杏花白鶲

天工翦刻為誰妍抱蕡游蜂自作團把酒惜春都是夢  
不如閒客此閒看

蓮龜

半脫蓮房露壓欹綠荷深處有游龜只應翡翠蘭苕上  
獨見玄夫曝日時

僕領貢舉未出錢穆父雪中作詩見及三月二

十日同遊金明池始見其詩次韻為答

雪知我出已全消花待君來未敢飄行避門生時小飲  
忽逢騎吏有嘉招魚龍絕技來千里斑白遺民數四朝  
知有黃公酒壚在蒼顏華髮自相遙

次韻子由五月一日同轉對

跪奉新書笏在腰談王正欲伴耕樵晉陽豈為一門事

高祖謂溫大推兄弟云我起義晉陽止為卿一門耳

宣政聊同五月朝

唐貞元中詔自

今後五月一日御宣政憂患半生聯出處歸休上策早  
殿與文武百僚相見

招要後生可畏吾衰矣刀筆從來錯料堯

韓康公挽詞三首

故國非喬木興王有世臣嗟予後死者猶及老成人德業經文武風流表縉紳空餘行樂地處處泣遺民

再世忠清德三朝翼贊勲功成不歸國就訪敢忘君舊學嚴詩律餘威靖塞氛何當繼韓奕故吏總能文

西第開東閣初筵點後塵笙歌邀白髮燈火樂青春扶路三更罷回頭一夢新賦詩猶墨濕把卷獨沾巾

栢石圖詩

并敘

陳公弼家藏栢石圖其子慥季常傳寶之東坡居士作詩以為之銘

栢生兩石間天命本如此雖云生之艱與石相終始韓子俯仰人但愛平地美土膏雜糞壤成壞幾何耳君看化槎牙豈有可移理蒼龍轉玉骨黑虎抱金柅畫師亦可人使我毛髮起當年落筆意正欲譏韓子

慶源宣義王丈以累舉得官為洪雅主簿雅州

戶掾遇吏民如家人人安樂之既謝事居眉  
之青神瑞草橋放懷自得有書來求紅帶既  
以遺之且作詩為戲請黃魯直學士秦少游  
賢良各為賦一首為老人光華

青衫半作霜葉枯遇民如兒吏如奴吏民莫作官長看  
我是識字耕田夫妻啼兒號刺史怒時有野人來挽鬚  
拂衣自注下下考芋魁飯豆吾豈無歸來瑞草橋邊路  
獨游還佩平生壺慈母巖前自喚渡青衣江上人爭扶

今年蠶市數州集中有遺民懷袴襦邑中之黠相指似  
白鬚紅帶老不癯我欲西歸卜隣舍隔牆拊掌容歌呼  
不學山王乘駟馬回頭空指黃公壚

次許冲元韻送成都高士敦鈴轄

余與高君奉使契丹辭免不行坐

核中老監本虛名懶作燕山萬里行  
看飛鴻迫使節歸來駿馬換傾城高才本不緣勲閥餘  
力還思治蜀兵西望雪山烽火盡不妨樽酒寄平生

次前韻送程六表弟

君家兄弟真連璧門十朱輪家萬石竹使猶分刺史符  
尚方行賜尚書舄前年持節發倉廩到處賣刀收璽粟  
歸來閉口不論功却走渡江誰復惜君才不用如澗松  
我老得全猶社櫟青衫莫厭百僚底白首上有千薪積  
憶昔江湖一釣舟無數雲山供點筆未應便障西風扇  
只恐先移北山檄憑君寄謝江南叟念我空見長安日  
浮江沂蜀有成言江水在此吾不食

和王晉卿題李伯時畫馬

督郵有良馬不為君所奇顧收紙上影駿骨何由歸一朝見紫策蟻封驚肉飛豈惟馬不遇人已半生癡

送錢穆父出守越州絕句二首

簿書常苦百憂集樽酒今應一笑開京兆從教思廣漢會稽聊喜得方回

若耶溪水雲門寺賀監荷花空自開我恨今猶在泥滓勸君莫棹酒船回

戲書李伯時畫御馬好頭赤

山西戰馬饑無肉夜嚼長稽如嚼竹蹄間三丈是徐行  
不信天山有坑谷豈如廄馬好頭赤立仗歸來臥斜日  
莫教優孟卜葬地厚衣薪槱入銅歷

送程七表弟知泗州

江湖不在眼塵土坐滿顏繫舟清洛尾初見淮南山淮  
山相媚好曉鏡開煙鬟持此娛使君一笑簿領間使君  
如天馬朝燕暮荆蠻時無王良手空老十二閑聊當出  
毫末化服狡與頑勿謂無人知古佛臨濤灣赤子視萬

類流萍閱人寰但使可此人餘事真茆管

送曹輔赴閩曹

曹子本儒俠筆勢翻濤瀾往來戎馬間邊風裂儒冠詩  
成橫槊裏楯墨何曾乾一旦事遠遊紅塵隔巖灘平生  
羊炙口並海搜鹹酸一從荔枝飲豈念首蓿槃我亦江  
海人市朝非所安常恐青霞志坐隨白髮闌淵明賦歸  
去談笑便解官今我何為者索身良獨難憑君問清淮  
秋水今幾竿我舟何時發霜露日已寒

次韻王郎子立風雨有感

百年一俯仰寒暑相主客稍增裘褐氣已覺團扇厄不須計榮辱此喪彼有獲我琴終不敗無攬故無驛後生不自牧呻吟空挾策揠苗不待長賣菜苦求益此郎獨靜退門外無行迹但恐陶淵明每為饑所迫淒風弄衣結小雪穿門席願君付一笑造物亦戯劇朝來賦雲夢筆落風雨疾為君裁春衫高會開桂籍

次韻黃魯直嘲小德小德魯直子其母微故其

詩云解著潛夫論不妨無外家

進饌客爭起小兒那可涯莫欺東方星三五自橫斜名  
駒已汗血老蚌空泥沙但使伯仁長還興絡秀家

書林次中所得李伯時歸去來陽關二圖後二

首

不見何戡唱渭城舊人空數米嘉榮龍眼獨識慙慙處  
畫出陽關意外聲

兩本新圖寶墨香樽前獨唱小秦王為君翻作歸來引

不學陽關空斷腸

送蹇道士歸廬山

物之有知蓋恃息孰居無事使出入心無天遊室不空  
六鑿相攘婦爭席法師逃人入廬山山中無人自往還  
往者一空還者失此身正在無還間縵縵不絕微風裏  
內外丹成一彈指人間俯仰三千秋騎鶴歸來與子遊  
臥病逾月請郡不許復直玉堂十一月一日鑠

院是日苦寒詔賜官燭法酒書呈同院

微霰疎疎點玉堂詞頭夜下攬衣忙分光御燭星辰爛  
拜賜官壺雨露香醉眼有花書字大老人無睡漏聲長  
何時却逐桑榆暖社酒寒燈樂未央

送周朝議守漢州

茶為西南病氓俗記二李

杞與稷也

何人折其鋒矯矯六君子

子

思道與姪正孺張永徽吳醇翁呂元鈞宋文輔也

君家尤出力流落初坐此

謂當收桑榆華髮看劖履胡為犯風雪歲晚行未已念  
歸誠得計顧自為謀耳吾聞江漢間瘡痏有未起莫輕

龔遂老君王付尺箋召還當有詔挽袖謝隣里猶堪作

水衡供帳園林美

木山

并敘

吾先君子嘗蓄木山三峯且為之記與詩詩人梅二丈  
聖俞見而賦之今三十年矣而猶子千乘又得五峯益  
奇因次聖俞韻使并刻之其側

聖俞詩

空山枯楠大蔽牛霹靂夜落魚鳧洲魚鳧水射幾千秋

蠹肌爛髓沙蕩流惟存堅骨蛟龍鍬形侔三山中雄酋  
左右兩峯相挾翼尊奉君長無慢尤蘇夫子見之驚且  
喜買於谿叟憑貂裘因嗟大不為梁棟又歎殘不為薪  
槱雨侵蘚澀得石瘦宜與夫子歸隱丘

次韻

木生不願回萬牛願終天年仆沙洲時來幸逢河伯秋  
愀然見怪推不流蓬婆雪領巧雕鏤蟄蟲行蟻為豪酋  
阿咸大膽忽持去河伯好事不汝尤城中古沼浸坤軸

一林瘦竹吾莞裘二頃良田不難買三年榦木行可標  
會將白髮對蒼巘魯人不厭東家丘

送千乘千能兩姪還鄉

治生不求富讀書不求官譬如飲不醉陶然有餘歡君  
看龐德公白首終泥蟠豈無子孫念顧獨遺以安鹿門  
上冢回牀下拜龍鸞躬耕竟不起耆舊節獨完念汝少  
多難冰雪落綺紈五子如一人奉養真色難烹鷄獨餽  
母自饗苜蓿葉口腹恐累人寧我食無肝西來四千里

敝袍不言寒秀眉似我兄亦復心閒寬忽然捨我去歲  
晚留餘酸我豈軒冕人青雲意先闌汝歸蒔松菊環以  
青琅玕檻陰三年成可以挂我冠清江入城郭小圃生  
微瀾相從結茆舍曝背談金鑾

送周正孺知東川

得郡書生榮還家昔人重而況東西川千騎許上家里  
門下車入父老自驚聳端如何武賢不事長卿寵清時  
養材傑杞梓方培擁未應遺合抱取用及把拱如君尚

出麾顧我宜耕壟告歸謝先手求去悔不勇豈云慕廉  
退實自知衰冗為君掃棠陰畫像或相踵

蜀中太守無不畫像者

題李伯時畫趙景仁琴鶴圖二首

清獻先生無一錢故應琴鶴是家傳誰知默鼓無絃曲  
時向珠宮舞幻仙

醜石寒松未易親聊將短曲調長人乘軒故自非明眼  
終日儼儼舞纏薪

次前韻再送周正孺

東川得望郎坐與西爭重高風傾石室舊學鄙文冢蜀人安使君所至野不聳竹馬迎細侯大錢送劉寵遙知向谿路老稚相扶擁看畫古叢祠百怪朝幽拱牛頭與兜率雲木蔚堆壠醉鄉追舊游筆陣賈餘勇聊將詩酒樂一掃簿書冗西風吹好句珠玉本無踵

劉蛻文蒙  
在梓州

書王定國所藏煙江疊嶂圖

王晉卿書

江上愁心千疊山浮空積翠如雲煙山耶雲耶遠莫知煙空雲散山依然但見兩崖蒼蒼暗絕谷中有百道飛

來泉紫林絡石隱復見下赴谷口為奔川川平山開林  
麓斷小橋野店依山前行人稍度喬木外漁舟一葉江  
吞天使君何從得此本點綴毫末分清妍不知人間何  
處有此境徑欲往置二頃田君不見武昌樊口幽絕處  
東坡先生留五年春風搖江天漠漠暮雲卷雨山娟娟  
丹楓翻鴉伴水宿長松落雪驚醉眠桃花流水在人世  
武陵豈必皆神仙江山清空我塵土雖有去路尋無緣  
還君此畫三歎息山中故人應有招我歸來篇

次韻王定國會飲清虛堂

何遜楊州又幾年  
官梅詩興故依然  
何人可復問季孟  
與子不妨中聖賢  
卜築君方淮上郡  
歸心我已劖南川  
此身正似蠶將老  
更盡春光一再眠

興龍節侍宴前一日微雪與子由同訪王定國

小飲清虛堂定國出數詩皆佳而五言尤奇  
子由又言昔與孫巨源同過定國感念存沒  
悲歎久之夜歸稍醒各賦一篇明日朝中以

示定國也

天風淅淅飛玉沙  
詔恩歸沐休早衙  
遙知清虛堂裏雪  
正似簷葛林中花  
出門自笑無所詣  
呼酒持勸惟君家  
踏冰凌競戰疲馬  
扣門剝啄驚寒鴉  
羨君五字入詩律  
欲與六出爭天葩  
頭風已倩檄手愈  
背癢恰得仙爪爬  
銀餅鴻油浮蟻酒  
紫盃鋪粟盤龍茶  
幅巾起作鵠鵠舞  
疊鼓誰掺漁陽楳  
九衢燈火雜夢寐  
十年聚散空咨嗟  
明朝握手殿門外  
共看銀闕暎晨霞

王晉卿所藏著色山二首

縹緲營丘水墨仙浮空出沒有無間爾來一變風流盡  
誰見將軍著色山

犖確何人似退之意行無路欲從誰宿雲解駿晨光漏  
獨見山紅澗碧時

次韻黃魯直效進士作歲寒知松柏詩

龍蟄雖高臥雞鳴不廢時炎涼徒自變茂悅兩相知已  
負棟梁質肯為兒女姿那憂霜賀未喜日遲遲難與

夏蟲語永無秋實悲誰知此植物亦解秉天彝

王晉卿作煙江疊嶂圖僕賦詩十四韻晉卿和之語特奇麗因復次韻不獨紀其詩畫之美亦為道其出處契闊之故而終之以不忘在莒之戒亦朋友忠愛之義也

山中舉頭望日邊長安不見空雲烟歸來長安望山上時移事改應潛然管絃去盡賓客散惟有馬埒編金泉渥洼故自千里足要飽風雪輕山川屈居華屋啞棗脯

十年俯仰龍旂前却因病瘦出奇骨鹽車之厄寧非天  
風流文采磨不盡水墨自與詩爭妍畫山何必山中人  
田歌自古非知田鄭虔三絕君有二筆勢挽回三百年  
欲將巖谷亂竊窕眉峯脩姱連娟人間何有春一夢  
此身將老蠶三眠山中幽絕不可久要作平地家居仙  
能令水石長在眼非君好我當誰緣願君終不忘在莒  
樂時更賦囚山篇

柳子厚有  
囚山賦

夜直玉堂攜李之儀端叔詩百餘首讀至夜半

書其後

玉堂清冷不成眠  
伴直難呼孟浩然  
暫借好詩消永夜  
每逢佳處輒參禪  
愁侵硯滴初含凍  
喜入燈花欲鬪妍  
寄語君家小兒子  
他時此句一時編

景仁和賜酒燭詩復次韻謝之

時公方進新樂

笙磬分均上下堂

舊說堂上之樂皆受笙均堂下之樂皆受磬均

游魚舞獸自

奔忙朱絃初識孤桐韻

舊樂金石聲高而絲聲微今樂金石與絲聲皆著

玉琯

猶聞秬黍香

舊法以尺生律今以律生尺

萬事今方洽伯始一

班我亦愧真長此生會見三雍就無復遼遼歎未央

次韻劉貢父春日賜幡勝

寬詔隨春出內朝三軍喜氣挾狐貉鏤銀錯落翻斜月  
翦綵繡紛舞慶宵臘雪強飛纔到地前一日微雪

是日暮

曉風偷轉

不驚條脫冠徑醉應歸臥便腹從人笑老韶次賜酒

再和

與君流落偶還朝過眼紛綸七葉貂莫笑華顛飄彩勝  
幾人黃壤隔青霄行吟未許窮騷雅坐嘯猶能出教條

記取明年江上郡五更春枕夢春韶

葉公秉王仲至見和次韻答之

珍稀方暑亦堪朝歲晚淒風憶阜貉共喜鵝鸞歸禁籞  
心知日月在重霄君如老驥初遭絡我似枯桑不受條  
強鋤霜鬚簪彩勝蒼顏得酒尚能韶

再和

衰遲何幸得同朝溫勁如君合珥貂誰惜異材蒙徑寸  
自慙枯朽借凌霄光風泛泛初浮水紅繆離離欲綴條

後日一樽何處共奉常端冕作咸韶

次韻王晉卿惠花栽栽所寓張退傅第中一首  
坐來念念失前人共向空中寓一塵若問此花誰是主  
天教閒客管青春

次韻王晉卿上元侍燕端門

月上九門開星河繞露臺君方枕中夢我亦化人來光  
動仙球縕香餘步輦回相從穿萬馬衰病若為陪

王鄭州挽詞 克臣

羨君華髮起琳宮右輔初還鼓角雄千里農桑歌子產  
一時冠蓋慕蕭嵩那知聚散春糧外便有悲歡過隙中  
京兆同僚幾人在猶思對案筆生風

予為開封幕與子難同廳

書王定國所藏王晉卿畫著色山二首

白髮四老人何曾在商顏煩君紙上影照我胸中山山  
中亦何有木老土石頑正賴天日光澗谷紛爛斑我心  
空無物斯文定何間君看古井水萬象自往還  
君歸嶺北初逢雪我亦江南五見春寄語風流王武子

三人俱是識山人

送呂昌朝知嘉州

不羨三刀夢蜀都聊將八詠繼東吳臥看古佛凌雲閣  
勅賜詩人明月湖得句會應緣竹鶴思歸寧復為尊鱸  
橫空好在脩眉色頭白猶堪乞左符

次韻黃魯直寄題郭明父府推頴州西齋二首

樹頭啄木常疑客客去而嗔定不然脫轄已應生井沫  
解衣聊復起庖煙平生詩酒真相汙此去文書恐獨賢

早晚西湖映華髮小舟翻動水中天

寂寞東京月旦州德星無復綴珠旒莫嗟平輿空神物  
尚有西齋接勝流春夢屢尋湖十頃家書新報橋千頭  
雪堂亦有思歸曲為謝平生馬少游輿音  
預

東坡全集卷十七

欽定四庫全書  
東坡全集卷十八

集部

東坡全集卷十八

宋蘇軾撰

詩一百一十五首

次韻秦少章和錢蒙仲

碧畦黃麗稻如京歲美人和易得情鑑裏移舟天外思  
地中鳴角古來聲山圍故國城空在潮打西陵意未平  
二子有如雙白鷺隔江相照雪衣明

次韻錢越州

驛尹超然定逸羣南遊端為訪雲門謫仙歸侍玉皇案  
老鶴來乘刺史轎已覺簿書哀老子故知邊豆有司存  
年來齒頰生荆棘習氣因君又一言

同秦仲二子雨中遊寶山

平明已報百吏散半日來陪二子間立鶴低昂煙雨裏  
行人出沒樹林間

去杭十五年復游西湖用歐陽察判韻

我識南屏金鯽魚重來拊檻散齋餘還從舊社得心印

似省前生覓手書葑合平湖久蕪漫人經豐歲尚凋疎  
誰憐寂寞高常侍老去狂歌憶孟諸

與莫同年雨中飲湖上

到處相逢是偶然夢中相對各華顛還來一醉西湖雨  
不見跳珠十五年

送子由使契丹

雲海相望寄此身那因遠適更沾巾不辭驛騎凌風雪  
要使天驕識鳳麟沙漠回看清禁月湖山應夢武林春

單于若問君家世莫道中朝第一人

次韻答劉景文左藏

我老詩壇仆鼓旗借君佳句發良時但空賀監杯中物  
莫示孫郎帳下兒夜燭催詩金燼落秋芳壓帽露華滋  
故應好語如爬癢有味難名只自知

座上復借韻送肯嵐軍通判葉朝奉

雲間踏白看纏旗莫忘西湖把酒時夢裏吳山連越嶠  
樽前羌婦雜胡兒夕烽過後人初醉春鴈來時雪未滋

為問從軍真樂否書來粗遣故人知

軾始於文登上得白石數升如芡實可作枕

聞梅丈嗜石故以遺其子子明學士子明有

詩次其韻

海隅荒怪有誰珍零落珊瑚泣季倫法供坐令微物重  
軾舊有怪石供色難歸致孝心純只疑薏苡來交趾未信蠔珠出泗濱願予聚為江夏枕不勞麾扇自寧親

次韻錢越州見寄

莫將牛弩射羊羣卧治何妨畫掩門稍喜使君無疾病  
時因送客見車轔搔頭白髮秋無數閉眼丹田夜自存  
欲息波瀾須引去吾儕豈獨坐多言

文登蓬萊閣下石壁千丈為海浪所戰時有碎  
裂淘灑歲久皆圜熟可愛土人謂此彈子渦  
也取數百枚以養石菖蒲且作詩遺垂慈堂

老人

蓬萊海上峯玉立色不改孤根捍滔天雲骨有破碎陽

俟殺廉角陰火發光采纍纍彈丸間瑣細成珠琲閣浮  
一漚耳真妄果安在我持此石歸袖中有東海垂慈老  
人眼俯仰了大塊置之益蓋中日與山海對明年菖蒲  
根連絡不可解儻有蟠桃生旦暮猶可待

次韻毛滂法曹感雨詩

江南佳公子遺我錦繡端攬之溫如春公子焉得寒興  
雨自有時膚寸便濛寢斂藏以自潤牛斗何足干空庭  
月與影強結三友歡我豈不足歟要此清團團所歡在

一醉常恐樽中乾捨酒尚可樂明珠如彈丸但恐千仞  
雀忽忽發虛彈迨子間暇時種子田中丹一朝涉世故  
空腹容欺謾我頃在東坡秋菊為夕餐永愧坡間人布  
褐為我完雪堂初覆瓦上簾無下莞時時亦設客每醉  
筒輒殫一笑便傾倒五年得輕安公子豈我徒衣鉢傳  
一簞定非郊與島筆勢江河寬悲吟古寺中穿帷雪漫  
漫他年記此味芋火對懶殘

送鄧宗古還鄉

廣漢有妻子孝弟行里間赤眉雖豺虎弛兵過其墟至  
今空清泉無復雙鯉魚南鄭有李邵得妙甘公書夜坐  
指流星驚倒兩使車抱闕不肯仕布褐蒙璠璵西南固  
多士君得二子餘凜凜忠文公搜士及樵漁澗谿有幽  
討蘋芷真嘉蔬歲晚終不食心惻當何如

參寥上人初得智果院會者十六人分韻賦詩

軾得心字

漲水返舊臺飛雲思故岑念君忘家客亦有懷歸心三

間得幽寂數步藏清深攢金盧橘塢散火楊梅林茶筍  
盡禪味松杉真法音雲崖有淺井玉醴常半尋遂名參  
寥泉可濯幽人襟相攜橫嶺上未覺衰年侵一眼吞江  
湖萬象涵古今願君更小築歲晚解我簪

哭王子立次兒子造韻三首

彭城初識子照眼白而長異夢成先兆

予為密州子立未嘗相識忽告

同舍生曰吾夢為密州婿何也已而果以子由之子妻之清言得未嘗豈惟知禮意

遂欲補詩亡子立能詩咄咄真相逼諸生敢鴈行而有禮學

非無侷鸞志獨有子雲悲恨子非天合猶能使我思兒

曹莫淒慟老眼欲枯萎會哭皆豪傑誰為感舊詩

子立與黃

魯直張文潛晁無咎秦少游陳無已皆友善

龍困嘗魚服羊儇或虎蒙忽忽成鬼錄憒憒到天公偶落藩牆上同游羿彀中回看十年事黃葉卷秋風

異鵠并叙

熙寧中柯侯仲常通守漳州以救饑得民有二鵠栖其廳事訖侯之去鵠亦送之漳人異焉為賦此詩

昔我先君子仁孝行於家家有五畝園公鳳集桐花是  
時鳥與鵲巢穀可俯挈憶我與諸兒飼食觀羣呀里人  
驚瑞異野老笑而嗟云此方乳哺甚畏鳶與蛇手足之  
所及二物不敢加主人若可信衆鳥不我遐故知中孚  
化可及魚與猴柯侯古循吏悃愞真無華臨漳所全活  
數等江干沙仁心格異族兩鵲栖其衙但恨不能言相  
對空楂楂善惡以類應古語良非夸君看彼酷吏所至

號鬼車

次韻詹適宣德小飲翼亭

君方夢謫仙

來詩記李  
白郎官湖

我亦弔文園

江上同三點天涯

又一樽濤雷殷白晝梅雪耿黃昏歸去多情雨應隨御

史軒

詹為御  
史主簿

東川清絲寄魯冀州戲贈

鶩溪清絲清如冰上有千歲交枝藤藤生谷底飽風雪  
歲晚忽作龍蛇升嗟我雖為老侍從骨寒只愛布與繒  
床頭錦衾未還客坐覺芒刺在背膺豈如尋卿晚乃貴

福祿正似川方增醉中倒著紫綺裘下有半臂出縹綾  
封題不敢妄裁翦刀尺自有佳人能遙知千騎出清曉  
積雪未放游塵興白須紅帶柳絲下老弱空巷人相登  
但放奇絞出領袖吾髯雖老無人憎

怡然以垂雲新茶見餉報以大龍團仍戲作小  
詩

妙供來香積珍烹具太官揀芽分雀舌賜茗出龍團曉  
日雲庵暖春風浴殿寒聊將試道眼莫作兩般看

次韻王忠玉遊虎丘絕句三首

當年太白此相浮老守娛賓得二丘

郡人有閭丘公太  
守王規父嘗云不

謁虎丘即謁閭丘  
規父忠玉伯父也

白髮重來故人盡空餘叢桂小山幽

青蓋紅旗映玉山新詩小草落玄泉風流使者人爭看

知有真娘立道邊

虎丘中路  
有真娘墓

使君未敢借驚鴻

寄蔡子華

故人送我東來時手栽荔子待我歸荔子已丹吾髮白  
猶作江南未歸客江南春盡水如天腸斷西湖春水船  
想見青衣江畔路白魚紫筍不論錢霜鬢三老如霜檣  
舊交零落今誰在莫從唐舉問封侯但遣麻姑更爬背  
和錢四寄其弟龢

再見濤頭涌玉輪煩君久駐浙江春年來總作維摩病  
堪笑東西二老人

卧病彌月聞垂雲花開順闔梨以詩見招次韻

答之

道人心似水不礙照花妍燕坐春強半清陰月屢遷平  
生無起滅一念有陳鮮嫋嫋風枝舉離離日萼蕪病吟  
終少味老醉不成顛何必邊頭出湖中有散仙

故周茂叔先生濂谿

谿在廬山下

世俗眩名實至人疑有無怒移水中蟹愛及屋上鳥坐  
令此溪水名與先生俱先生本全德廉退乃一隅因拋  
彭澤米偶似西山夫遂即世所知以為溪之呼先生豈

我輩造物乃其徒應同柳州柳聊使愚溪愚

次韻子由使契丹至涿州見寄四首

老人癡鈍已逃寒子復辭行理亦難要到盧龍看古塞

投文易水弔燕丹

余昔年辭免使北

胡羊代馬得安眠窮髮之南共一天又見子卿持漢節  
遙知遺老泣山前

禮毳年來亦甚都時時鶴舌問三蘇

予與子由入京時北使已問所在後余館

伴北使屢三蘇文那知老病渾無用欲問君王乞鏡湖  
誦

始憶庚寅降屈原旋看蠟鳳戲僧虔隨翁萬里心如鐵  
此子何勞為買田

時猶予遲待行

雪後便欲與同僚尋春一病彌月雜花都盡獨

牡丹在耳劉景文左藏和順閣梨詩見贈次

韻答之

殘花怨久病剩雨泣餘妍不見雙旌出空令九陌遷

開闢

市井皆入知君苦寂寞妙語嚼芳鮮淺紫從爭發淳紅任早

驚天葩尚青萼國色待華顛載酒邀詩將臞儒不是仙

次韻劉景文周次元寒食同游西湖

絮飛春減不成年老境同乘下瀨船藍尾忽驚新火後

樂天寒食詩云三盃

月二日出游至

成都太守自正

月二日出游至

藍尾酒一楪膠牙餳邀頭要及浣花前

成都太守自正

四月十九日

山西老將詩無敵洛下書生語更妍共向

浣花乃止

北山尋二士畫橈鼉鼓聒清眠

連日與王忠玉張全翁游西湖訪北山清順道

潛二詩僧登垂雲亭飲參寥泉最後過唐州

陳使君夜飲忠玉有詩次韻答之

北山非自高千仞付我足西湖亦何有萬象生我目雲  
深人在塢風靜響應谷與君皆無心信步行看竹竹間  
逢詩鳴眼色奪湖渌百篇成俯仰二老相追逐故應千  
頃池養此一雙鵠山高路已斷亭小膝屢促夜尋三尺  
井渴飲半甌玉明朝鬧絲管寒食雜歌哭使君坐無聊  
狂客來不速載酒有鵠夷扣門非啄木浮蛆瀛金盜翠  
羽出華屋須臾便陳迹覺夢那可續及君未渡江過我  
勤秉燭一笑換人爵百年終鬼錄

新茶送簽判程朝奉以餽其母有詩相謝次韻

答之

縫衣付與溧陽尉捨肉懷歸穎谷封聞道平反供一笑  
會須難老待千鍾火前試焙分新勝雪裏頭綱轂賜龍  
從此升堂是兄弟一甌林下記相逢

次韻送張山人歸彭城

羨君飄蕩一虛舟來作錢塘十日遊水洗禪心都眼淨  
山供詩筆總眉愁雪中乘興真聊爾春盡思歸却罷休

何日五湖從范蠡種魚萬尾橘千頭

次韻林子中王彥祖唱鷗

早知身寄一漚中晚節尤驚落木風

近聞莘老公擇  
皆逝故有此句昨

夢已論三世事歲寒猶喜五人同

軾與子中彥祖子敦  
完夫同試舉人景德

寺今  
皆健雨餘北固山園座春盡西湖水映空差勝四明狂

監在更將老眼犯塵紅

壽星院寒碧軒

清風肅肅搖窗扉窗前修竹一尺圍紛紛蒼雪落夏簟

冉冉綠霧靄人衣日高山蟬抱葉響人靜翠羽穿林飛  
道人絕粒對寒碧為問鶴骨何緣肥

書劉景文所藏王子敬帖絕句

家雞野鷺同登俎春蚓秋蛇總入奩君家兩行十二字  
氣壓鄰侯三萬籜

書劉景文所藏宗少文一筆畫

宛轉回紋錦繁盈連理花何須郭忠恕匹素畫繅車

真覺院有落花花時不暇往四月十八日與劉

景文同往賞枇杷

綠暗初迎夏紅殘不及春魏花非老伴盧橘是鄉人井落依山盡巖崖發興新歲寒君記取松雪看蒼鱗

又和劉景文韻

牡丹松檜一時栽付與春風自在開試問壁間題字客幾人不為看花來

西湖壽星院此君軒

臥聽謾謾碎龍鱗俯看蒼蒼立玉身一舸鷗夷江海去

尚餘君子六千人

仲天貺王元直自眉山來見余錢塘留半歲既  
行作絕句五首送之

仲君豈弟多學王子清修寡言病後空驚鶴瘦時來或  
作鵬鵠

海角煩君遠訪江源與我同來剩作數詩相送莫教萬  
里空回

三人一旦同行二子與秦少章同寓高齋復同舟北行留下高齋月明遙

想扁舟京口尚餘孤枕潮聲

更欲留君久住念君去國彌年空使犀顱玉頰長懷鬢  
舅悽然

為予遠致慇懃瑞草橋邊老人紅帶雅宜華髮白醪光

泛新春老人王慶源也

贈善相程傑

心傳異學不謀身自要清時閱搢紳火色上騰雖有數  
急流勇退豈無人書中苦覓元非訣醉裏微言却近真

我似樂天君記取華顛賞遍洛陽春

次韻林子中蒜山亭見寄

奇逸多聞老散通  
何人慷慨解憐翁  
十年簿領催衰白  
一笑江山發醉紅  
聞道賦詩臨北固  
未應舉扇向西風  
叩頭莫喚無家客  
歸掃岷峩一畝宮

再和并答楊次公

毗盧海上妙高峯  
二老遙知說此翁  
聊復艤舟尋紫翠  
不妨持節散陳紅  
高懷却有雲門興  
好句真傳雪竇風

唱我三人無譜曲馮夷亦合舞幽宮

次韻劉景文送錢蒙仲三首

誰識天閒老驥不爭日暮長途送盡青雲九子歸去扁

舟五湖

寄語竹林社友同書桂籍天倫王郎獨為鬼錄世間無  
此玉人

五字古原春草千金漢殿長門經緯尚餘三策典刑留

與諸孫

菩提寺南漪堂杜鵑花

南漪杜鵑天下無披香殿上紅氍毹鶴林兵火真一夢

不歸閬苑歸西湖

題楊次公春蘭

春蘭如美人不採羞自獻時聞風露香蓬艾深不見丹青寫真色欲補離騷傳對之如靈均冠佩不敢燕

題楊次公蕙

蕙本蘭之族依然臭味同曾為水仙佩相識楚詞中幻

色雖非寶真香亦竟空云何起微馥鼻觀已先通

次韻曹輔寄壑源試焙新芽

仙山靈雨濕行雲洗遍香肌粉未勻  
明月來投玉川子清風吹破武林春  
要知玉雪心腸好不是膏油首面新  
戲作小詩君一笑從來佳茗似佳人

次韻袁公濟謝芎椒詩

燥吻時時著酒濡要令卧疾致文殊  
河魚潰腹空號楚汗水流霰始信吳

吳真君服椒法云半  
年脚心汗如水

自笑方求三歲艾

不如長作獨眠夫羨君清瘦真仙骨更助飄飄鶴背軀

次韻和楊次公惠徑山龍井水

龍井水洗病眼有效

漏盡雞號厭夜行年來小器溢鋗棄官縱未歸東海  
罷郡猶堪作水衡幻色將空眼先暗勝游無礙脚殊輕  
空煩遠致龍淵水寧復臨池似伯英

次韻劉景文登介亭

澤國梅雨餘衰年困蒸溽高堂磨新磚頗覺利腰足松  
根百尺井兩绠飛淨渌流觴聚兒童一笑為捧腹清風

信可馭剛氣在巖麓始知共此世物外無三伏長歌入  
雲去不待絃管逐西湖真西子煙樹點眉目濤江少醞  
藉高浪翻雪屋俛仰拊四海百世飛鳥速遠追錢氏餘  
近弔祖侯躅吾生如寄耳寸晷輕尺玉誰似劉將軍逸  
韻謝邊幅千言一揮手五車不再讀春巖彩雞舞月峽  
哀猿哭朝先啼鳩起莫與寒蟬續我老廢吟哦賴君時  
擊觸從今事遠覽發軾此幽谷清游得三昧至樂謝五  
欲莫作狂道士氣壓劉師服

袁公濟和劉景文登介亭詩復次韻答之

昏昏愴醉夢奈此六月溽君詩如清風吹我朝睡足登  
臨得佳句江白照湖渌袖手獨不言默橐已在腹是時  
風雨過藹藹雲歸麓疎星帶微月金火爭見伏惜哉此  
清景變滅不可逐歸來讀君詩耿耿猶在目却思少年  
日聲價爭場屋文如翻水成賦作义手速秋風起鴻鴈  
我亦繼華躅那知君蹭蹬獨泣荆山玉相見南新道青  
衫垂破幅早知事大繆恨不十年讀莫嫌馮唐老終勝

賈誼哭今年復為僚舊好許重續升沈何足道等是蠻  
與觸共為湖山主出入窮澗谷衆馳君不爭人棄我所  
欲何時神武門相約挂冠服

介亭餞楊傑次公

藍輿西出登山門嘉與我友尋仙村丹青明滅風篁嶺  
環珮空響桃花源郡人謂介亭山下為桃源路前朝欲上已蠟屐黑  
雲白雨如傾盆今晨積霧卷千里豈畏觸熟生病根在  
家頭陁無為子久與青山為弟昆孤峯盡處亦向有西

湖鏡天江抹坤臨高麾手謝好住清風萬壑傳其言風  
回響答君聽取我亦到處隨君軒

次京師韻送表弟程懿叔赴夔州運判

與子甥舅氏摧頽各蒼顏並為東諸侯長此佳江山寒  
松無時花安得插鬢鬟惟將老不死一笑榮枯間我甚  
似樂天但無素與蠻挂冠及未耄當獲一紀閒子亦拙  
進取才高命堅頑譬如萬斛舟行此九折澇仲氏新得  
道一漚自塵寰君之兄德孺自言近於佛法有得歲晚家鄉路莫遣生

榛骨

葉教授和濤字韻詩復次韻為戲記龍井之游

先生魯諸儒飲食清不濶空腸出秀句吟嚼五味足華堂  
闌絲管眸子漲春暎先生疾走避面冷毒在腹歸來  
煮瓠葉弟子歌早麓聲淫及靈臺中有鹿鹿伏功名一  
走兔何用千人逐故應容我輩清座時閒目高亭石排  
衙木杪挂飛屋我來無時節客亦不待速似聞雪髯叟  
西嶺訪遺躅朝陽入潭洞金碧涵水玉泉扉夜不扃雲

袂本無幅慈皇付寶偈神侶得幽讀訥庵有老人宴坐  
天魔哭時來獻纓絡法供燈相續吾儕詩酒汙欲往無  
乃觸齋廚費晨炊車騎滿山谷願聞第一義鉢飯非所  
欲便投切雲冠予幼好奇服

次韻林子中見寄

飄零洛社數遺民詩酒當年困惡賓元亮本無適俗韻  
孝章要是有名人蒜山小隱雖為客江水西來亦帶岷  
卷却西湖千頃綠笑看魚尾更莘莘

安州老人食蜜歌 贈僧仲殊

安州老人心似鐵，老人心肝小兒舌不食五穀，惟食蜜。  
笑指蜜蜂作檀越，蜜中有詩人不知。千花百草爭含笑，  
老人咀嚼時一吐，還引世間癡小兒。小兒得詩如得蜜，  
蜜中有藥治百疾。正當狂走捉風時，一笑看詩百憂失。  
東坡先生取人廉，幾人相歡幾人嫌。恰似飲茶甘苦雜，  
不如食蜜中邊甜。佛云吾言譬如此食蜜中邊皆甜因君寄與雙龍餅鏡，  
空一照，雙龍影三呉。六月水如湯，老人心似雙龍井。

次韻錢穆父紫薇花二首

虛白堂前合抱花秋風落日照橫斜閨人此地知多少

物化無涯生有涯

虛白堂前紫薇兩株俗云樂天所種

折得芳蕤兩眼花題詩相報字傾斜箇中尚有絲綸句

坐覺天光照天涯

樂天詩云絲綸閣下文章靜鐘鼓樓中刻漏長獨坐黃昏誰是伴紫薇花

對紫薇郎上嘗書此詩以賜軾

送張嘉州

少年不願萬戶侯亦不願識韓荊州頗願身為漢嘉守

載酒時作凌雲遊虛名無用今白首夢中却到龍泓口  
浮雲軒冕何足言惟有江山難入手峩眉山月半輪秋  
影入平羌江水流謫仙此語誰解道請君見月時登樓  
笑談萬事真何有一時付與東巖酒佛峽人家自舊有名歸來  
還受一大錢好意莫違黃髮叟

次韻蘇伯固主簿重九

雲間朱袖拂雲和知是長松挂女蘿鬢重不嫌黃菊滿  
手香新喜綠橙搓墨翻衫袖吾方醉紙落雲煙子患多

只有黃雞與白髮玲瓏應識使君歌

送李陶通直赴清溪

忠文文正二大老

司馬溫公范蜀公君之師友

蘇李廣平三舍人

蘇子

容宋次道與先公才元熙寧中封還

李定詞頭天下謂之三舍人

喜見通家賢子弟自

言得邑少風塵從來勢利闊心薄此去溪山琢句新肯向西湖留數月錢塘初識小麒麟

次韻楊公濟奉議梅花十首

梅梢春色弄微和作意南枝翦刻多月黑林間蓬縞袂

霸陵醉尉誤誰何

相逢月下是瑤臺  
藉草清樽連夜開  
明日酒醒應滿地  
空令饑鶴啄葵苔

綠髮尋春湖畔回  
萬松嶺上一枝開  
而今縱老霜根在  
得見劉郎又獨來

月地雲階漫一樽  
玉奴終不負東昏  
臨春結綺荒荆棘  
誰信幽香是返魂

日出冰湖散水花  
野梅官柳漸欹斜  
西郊欲就詩人飲

黃四娘東子美家

君知早落坐先開  
莫著新詩句句催  
嶺北霜枝最多思  
忍寒留待使君來

冰盤未薦含酸子  
雪嶺先看耐凍枝  
應笑春風木芍藥  
豐肌弱骨要人醫

寒雀喧喧凍不飛  
遠林空嘵未開枝  
多情好與風流伴  
不到雙雙燕語時

鮫綃翦碎玉簪輕  
檀暉粧成雪月明  
肯伴老人春一醉

懸知欲落更多情

縞裙練帨玉川家  
肝膽清新冷不邪  
穠李爭春猶辦此  
更教踏雪看梅花

贈劉景文

荷盡已無擎雨蓋  
菊殘猶有傲霜枝  
一年好景君須記  
最是橙黃橘綠時

謝關景仁送紅梅栽二首

年年芳信負紅梅  
江畔垂垂又欲開  
珍重多情關令尹

直和根撥送春來

為君裁向南堂下記取他年著子時酸釀不堪調衆口  
使君風味好攢眉

辯才老師退居龍井不復出入軒往見之嘗出  
至風篁嶺左右驚曰遠公復過虎溪矣辯才  
笑曰杜子美不云乎與子成二老來往亦風  
流因作亭嶺上名之曰過溪亦曰二老謹次

辯才韻賦詩一首

日月轉雙轂古今同一丘惟此鶴骨老凜然不知秋去  
住兩無礙人天爭挽留去如龍出山雷雨卷潭湫來如  
珠還浦魚鼈爭駢頭此生暫寄寓常恐名實浮我比陶  
令愧師為遠公優送我還過溪溪水當逆流聊使此山  
人永記二老遊大千在掌握手有離別憂

送程之邵僉判赴闕

夜光不自獻天驥良難知從來一狐腋或出五羖皮賢  
哉江東守收此幕中奇無華豈易識既得不自隨留君

望此府助我憐其衰二年促膝語一旦長揖辭林深伏  
猛在岸改潛珍移去此當安從失君徒自悲念君瑚璉  
質當今臺閣宜去矣會有合豈常懷其私

寄題梅宣義園亭

仙人子真後還隱吳市門不惜十年力治此五畝園初  
期橘為奴漸見桐有孫清池壓丘虎異石來湖龜敲門  
無貴賤遂性各琴尊我本放浪人家寄西南坤敝廬雖  
尚在小圃誰當樊羨君欲歸去奈此未報恩愛予幸僚

友久要疑弟昆明年過君西飲我空餅盆

熙寧中軾通守此郡除夜直都廳囚繫皆滿日  
莫不得返舍因題一詩于壁今二十年矣衰

病之餘復忝郡寄再經除夜庭事蕭然三國  
皆空蓋同僚之力非拙朽所致因和前篇呈

公濟子侔二通守

前詩

除日當早歸官事乃見留執筆對之泣哀此繫中囚小

人營餚糧墮網不知羞我亦戀薄祿因循失歸休不須  
論賢愚均是為食謀誰能暫縱遣閔默愧前修

今和

山川不改舊歲月逝肯留百年一俯仰五勝更王囚同  
僚比岑范德業前人羞坐令老鈍守嘯諾獲少休却思  
二十年出處非人謀齒髮付天公缺壞不可修

遊寶雲寺得唐彥猷為杭州日送客舟中手書

一絕句云山雨霏微不滿空畫船來往疾輕

鴻誰知獨卧朱簾裏一榻無塵四面風明日  
送彥猷之子壻赴郢州舟中遇微雨感歎前  
事因和其韻作兩首送之且歸其書唐氏

二妙凋零筆法空忽驚雲海戲羣鴻清詩不敢私囊篋  
人道黃門有父風黃門衛恒也

出處榮枯一笑空十年社燕與秋鴻誰知白首長河路  
還卧當時送客風

送江公著知吉州

三吳行盡千山水猶道桐廬更清美豈惟濁世隱狂奴  
時平亦出佳公子初冠惠文讀城旦晚入奉常陪劖履  
方將華省起彈冠忽憶釣臺歸洗耳未應良木棄大匠  
要使名駒試千里奉親官舍當有擇得郡江南差可喜  
自粲連檣一萬艘紅粧執樂三千指簿書期會得餘閒  
亦念人生行樂耳二耳義不同故得重用

聞錢道士與越守穆父飲酒送二壺

龍根為脯玉為漿下界寒醅亦漫嘗一紙鶩經逆少醉

他年鵬賦謫仙狂金丹自足留衰鬢苦淚何須點別腸  
吳越舊邦遺澤在定應符竹付諸郎

次韻劉景文路分上元

華燈闕難歲冷月掛空府三吳重時節九陌自歌舞云  
從月幾望遂至一百五嘉辰可屈指樂事相繼武今宵  
掃雲陣極目淨天宇嬉遊各忘歸闌咽頃未覩飛毬互  
明滅激水相呑吐老去反兒童歸來尚鎸鼓新年消暗  
雪舊歲添絲縷何時九江城相對兩漁父予舊欲卜居  
廬山景文近

賈宅  
江州

再和楊公濟梅花十絕

一枝風物便清和看盡千林未覺多結習已空從著袂  
不須天女問云何

天教桃李作輿臺故遣寒梅第一開憑仗幽人收艾納  
國香和雨入青苔

白髮思家萬里回小軒臨水為花開故應剩作詩千首  
知是多情得得來

人去殘英滿酒樽  
不堪細雨濕黃昏  
夜寒那得穿花蝶  
知是風流楚客魂

春入西湖到處花  
裙腰芳草抱山斜  
盈盈解佩臨煙浦  
脈脈當壚傍酒家

莫向霜晨怨未開  
白頭朝夕自相催  
斬新一朶含風露  
恰似西廂待月來

洗盡鉛華見雪肌  
要將真色鬪生枝  
檀心已作龍涎吐  
玉頰何勞獮髓醫

湖面初驚片片飛  
尊前吹折最繁枝  
何人會得春風意  
怕見梅黃雨細時

長恨漫天柳絮輕  
只將飛舞占清明  
寒梅似與春相避  
未解無私造物情

北客南來豈是家  
醉看參月半橫斜  
他年欲識吳姬面  
秉燭三更對此花

與葉淳老侯敦夫張秉道同相視新河秉道有

詩次韻二首

君不見元帥府前羅萬戟濤頭未順千弩射至今鳳凰  
山下路長借一箭開兩翼我鑿西湖還舊觀一眼已盡  
西南碧又將回奪浮山險千艘夜下無南北坐陳三策  
本人謀惟留一諾待我畫老病思歸真暫寓功名如幻  
終何得從來自笑畫蛇足此事何殊食雞肋憐君嗜好  
更迂濶得我新詩喜折屐江湖粗了我徑歸餘事後來  
當潤色一庵閒卧洞霄宮井有丹砂水長赤

荆溪父老愁三害下斬長蛟本無賴平生倔強韓退之

文字猶為鰐魚戒石門之役萬金耳首鼠不為吾已隘  
江湖開塞古有數兩鵠飛來告成壞勸農使者非常人  
一言已破黎民駭上饒使君更超逸坐睨浮山如累塊  
髯張乃我結襪生詩酒淋漓出狂怪我作水衡生作丞  
他日歸朝同此拜

櫻筍并叙

櫻筍狀如魚剖之得魚子味如苦筍而加甘芳蜀人以  
饌佛僧甚貴之而南方不知也筍生膚毳中蓋花之方

孕者正二月間可剥取過此苦澀不可食矣取之無害  
於木而宜於飲食法當蒸熟所施略與筍同蜜煮酢浸  
可致千里外今以餉殊長老

贈君木魚三百尾中有鶩黃子魚子夜叉剖灑欲分甘  
檳榔藏頭敢言美願隨蔬果得自用勿使山林空老死  
問君何事食木魚烹不能鳴固其理

次韻曹子方龍山真覺院瑞香花

幽香結淺紫來自孤雲岑骨香不自知色淺意殊深移

裁青蓮宇遂冠薈葛林。紉為楚臣佩。散落天女襟。君持  
風霜節。耳冷歌笑音。一逢蘭蕙質。稍回鐵石心。置酒要  
妍暖。養花須晏陰。及此陰晴間。恐致慳嗇霖。綵雲知易  
散。羈鶴憂先吟。明朝便陳迹。試著丹青臨。

次韻曹子方運判雪中同遊西湖

詞源艷艷波頭展。清唱一聲巖谷滿。未容雪積句先高。  
豈獨湖開心自遠。雲山已作歌眉淺。山下碧流清似眼。  
尊前侑酒只新詩。何異書魚餐蠹簡。

次韻仲殊雪中游西湖二首

夜半幽夢覺稍聞竹葦聲起續凍折絃為鼓一再行曲  
終天自明玉樓已崢嶸有懷二三子落筆先飛霙共為  
竹林會身與孤鴻輕秀語出寒餓身窮詩乃亨禪老復  
何為笑指孤煙生我獨念粲者誰與予目成

寶雲樓閣閑千門林靜初無一鳥喧閉戶莫教風掃地  
卷簾疑有月臨軒水光潋滟猶浮碧山色空濛已歛昏  
乞得湯休奇絕句始知鹽絮是陳言

次韻參寥同前

朝來處處白鵲鋪樓閣山川盡一如總是爛銀并白玉  
不知奇貨有誰居

送小本禪師赴法雲

寓形天宇間出處會有役澹然都無營百年何由畢山  
林等憂患軒冕亦戲劇我未即歸休師寧便安逸王城  
滿豪傑議論紛黑白聖諦第一義對面誰不識師來亦  
何事孤月挂空碧是身如浮雲安可限南北出岫本無

心既雨歸亦得珠泉有舊約何年挂鋤錫

書渾令公燕魚朝恩圖

咸寧英氣似汾陽夜飲軍容出紅粧不須纏頭萬匹錦  
知卿未辨作呂強

息壤詩并叙

淮南子曰鯀堙洪水盜帝之息壤帝令祝融殺之于羽  
淵今荊州南門外有狀若屋宇陷入地中而猶見其脊  
者旁有石記云不可犯畚鍤所及輒復如故又頗以致

雷雨歲大旱屢發有應予感之乃為作詩其詞曰

帝息此壤以藩幽臺有神司之隨取而培帝勅下民無  
敢或開惟帝不言以雷以雨惟民知之幸帝之恕帝茫  
不知誰敢以告帝怒不常下土是震使民前知是役于  
民無是墳者誰取誰予惟其的之是以射之

新渠詩并叙

庚子正月予過唐州太守趙侯始復三陂疏召渠招懷  
遠人散耕于唐予方為旅人不得親執壺漿簞食以與

侯勸逆四方之來者獨為新渠詩五章以告于道路致  
侯之意其詞曰

新渠之水其來舒舒溢流于野至于通衢渠成如神民  
始不知問誰為之邦君趙侯新渠之田在渠左右渠來  
奕奕如赴如湊如雲斯積如屋斯溜嗟唐之人始識稅  
稌新渠之民自淮及潭挈其婦姑或走而顛王命趙侯  
宥我新民無與王事以訖七年侯謂新民爾既來止其  
歸爾邑告爾隣里良田千萬爾擇爾取爾耕爾食遂為

爾有築室于唐孔碩且堅生為唐民飽粥與餧死葬于唐祭有雉豚天子有命我惟爾安

顏樂亭詩 幷叙

顏子之故居所謂陋巷者有井存焉而不在顏氏久矣  
膠西太守孔君宗翰始得其地浚治其井作亭於其上  
命之曰顏樂昔夫子以簞食瓢飲賢顏子而韓子乃以  
為哲人之細事何哉蘇子曰古之觀人也必於其小者  
觀之其大者容有偽焉人能碎千金之璧不能無失聲

於破釜能搏猛虎不能無變色於蠭薑孰知簞食瓢飲  
之為哲人之大事乎乃作顏樂亭詩以遺孔君正韓子  
之說且以自警云

天生烝民為之臭口美者可嚼芬者可嗅美必有惡芬  
必有臭我無天遊六鑿交鬪驚而不反跬步商受偉哉  
先師安此微陋孟賁股慄虎豹却走眇然其身中亦何  
有我求至樂千載無偶執瓢從之忽焉在後

東坡全集卷十八

謹案卷十七第十一頁後一行不知頭屬舞鈞天

刊本屬訛冒據文選改

第十四頁後五行移中老監本虛名刊本移訛移

據施本改

第二十五頁後一行無復遠遼歎未央刊本遠遠

訛寥寥據五噫歌改

卷十八第一頁後五行立鶴低昂煙雨裏按施本

鶴作鶴

第五頁後八行諸生敢雁行刊本敢訛取據施本  
改字

第十頁前七行開園市井皆入按施本園下有時

總校官庶吉士臣張能照  
校對官助教臣金學詩  
謄錄監生臣徐士俊

